

առողջ մտքի ազդեցութիւնը ակններեւ է անգամ բոլոր նրանց վրայ, որ դեռ երէկ ժխտում էին այն՝ իր հիմքում իսկ: Անգամ նրանց քաղաքական եւ ընկերային բառարանի մի շարք արտայայտութիւններ փոխ առնուած են երէկի եւ այսօրուան հակառակորդներին, թէեւ ինքնաբոլոս, հարազատ չեն եւ այդ իսկ պատճառով նրանց բերնում հնչում են որպէս մուրացածոյ:

Իսկ այսօր: Հետեւեցէք Եւրոպայի մարքսիստների ազգային քաղաքականութեան, այսինքն՝ բոլոր նրանց, որոնք երէկ ի լուր աշխարհի մէկ բերան գոռում էին — «պրոլետարը հայրենիք չունի»:

Թողնենք միւսներին մի կողմը, առնենք մարքսիզմի դասական հայրենիքը, Գերմանիան:

Առանց չափազանցութեան կարելի է պընդել, թէ սարեր ու ձորեր են առաջացել այս երկրի սոցիալ-դեմոկրատիայի եւ նրա ղեկավարների մտայնութեան մէջ՝ ինչպէս մի շարք ուրիշ, նոյնպէս նաեւ ազգային քաղաքականութեան խնդրում: Նրանք այսօր ոչ միայն հինցած են համարում եւ միանգամայն ժխտելի՝ «պրոլետարը հայրենիք չունի» նշանախօսքը, այլ հայրենիքը եւ ազգային բարիքները համարում են նախ եւ առաջ նրա, պրոլետարիատի, եւ առհասարակ աշխատաւոր զանգուածների սեփականութիւն:

Աւելին դեռ: Այսօր Գերմանիայում եւ գերման Աւստրիայում գոյութիւն չունի եւ ոչ մի ուրիշ կուսակցութիւն, որ այնպէս մեծ թափով ու հետեւողականութեամբ հետապընդելիս լինի գերման հողերի եւ հատուածների ամբողջացումը, ինչպէս՝ այս երկրի սոցիալ-դեմոկրատիան: Ոչ պակաս չափով նաեւ՝ աւստրիական քոյր կուսակցութիւնը: Ես չեմ մոռացել այդ ուղղութեամբ արտասանուած այն խորը հայրենասիրական ճառերը, որ տարիներ առաջ ընտրական մի պայքարի միջոցին լսեցի այստեղ, Բերլինում, Աւստրիոյ սոցիալ-դեմոկրատիայի անուանի պարագլուխ Օտտո Բաուէրի եւ «Յորվէրտս»ի խմբագիր Ֆրիդըրիխ Ծտամաֆէրի բերնից:

Մի ուրիշ օրինակ: Երկու երեք տարի առաջ հիմնուած գերման-աւստրիական ժողովրդային միութեան մասնակի նպատակն է՝

հետապընդել այդ երկու գերման երկիրներին միացումը, աւելի շուտ՝ Աւստրիոյ կցումը Գերմանիային իսկ այդ միութեան հիմնադիր-ղեկավարների առաջին շարքերում է գըլտնըւում ոչ այլ ոք, քան Ռայխսթագի նախագահ եւ գերման սոցիալ-դեմոկրատիայի պարագլուխ Պաուլ Լէօքէն: Նրա գործակիցներն էլ մի խոշոր չափով ընկերվարականներ են: Եւ նրանք բոլորը ամէն պատեհ առիթով բանաւոր ու գըրաւոր պրոպագանդ են մղում այդ գաղափարի շուրջը: Եւ այս՝ պարտուած Գերմանիայում եւ Աւստրիայում, Վերսայլի դաշնագրից յետոյ:

Կարճ, «Միացեալ Գերմանիայի» դրօշակակիրները այսօր գերազանցօրէն մարքսիստներ եւ ընկերվարականներ են: Նրանք հարկադրուած են յաճախ մինչեւ իսկ պայքար մըղել, այդ գաղափարի համար, ընդդէմ քաղքենի տարրերի: Ուրիշ խօսքով, ինչ որ ըստ էութեան տարիներ առաջ հետապընդում էին համագերմանականները, այս օր իւրացրել են ընկերվարականները, միայն թէ «համագերմանականութիւն» նշանախօսքը փոխարինել են, «Մեծ Գերմանիա» (Grossdeutschland) աւելի առողջ եւ իրական նշանախօսքով:

Մեծ կամ Միացեալ Գերմանիան է որ, ըստ գերման ընկերվարականների, իր մէջ պիտի առնի ոչ միայն Աւստրիան, այլ եւ Գերմանիայից զատուած մի քանի ուրիշ գաւառներ եւս, յատկապէս արեւելեան սահմաններ վրայ:

Գաւաճանե՞լ են գերման եւ աւստրիական ընկերվարականները, որդեգրելով ազգային նոր, առողջ քաղաքականութիւն, թէ՞ այժմ են կեցել ուղիղ ճամբու վրայ, յարմարուելով իրականութեան, ինչպէս եւ գաղափարների աշխարհում կատարուող հզոր բնաշրջման (էվոլյուցիա) օրէնքին: Ի հարկէ վերջինս է ճըլմարիտը: Եւ այսպէս վարուելով նրանք ոտք են դրել իրապաշտ քաղաքականութեան գետնի վրայ:

Ի՞նչ խօսք, նրանք չեն պնդում, թէ վաղը կամ միւս օրը իրականանայ պիտի Միացեալ Գերմանիան: Ոչ էլ դրա համար սուսեր են ձօնում օդի մէջ, ռազմի ծրագիրներ արձուծում: Բնա՛ւ: Ո՞ր կուսակցութիւնն է աւելի հաշտա-